


歐陽全集

百二十九之三十一


制勅



漢書門			
四	九	二	一
冊	架	函	號

內閣文庫			
三	一	二	一
五	四	九	五
函	冊	號	類

內閣文庫			
番號	漢	10215	
冊數	44	(41)	
函號	315	48	



歐陽文忠公全集卷一百二十九

勅勅口宣七十五首

賜新除觀文殿學士禮部侍郎孫沔詔

賜知潁州徐宗况進奉賀交國公主出降銀絹

馬等勅書 賜知建昌軍沈造勅書


賜給事中叅知政事曾公亮生日詔

賜翰林學士兼侍讀學士尚書戶部郎中知制

誥知審刑院胡宿詔

賜判大理寺陳太素并權少卿楊開及審刑院

詳議官大理寺詳斷官等勅書



賜知舒州齊廨進新茶并知廣德軍浦延熙進
先春茶勅書

賜外任臣寮進奉乾元節銀絹馬勅書

賜彰信軍節度使檢校太保同中書門下平章
事判大名府李昭亮乞知西京不允詔

賜宣徽南院使淮康軍節度使張堯佐乞知西
京不允詔

賜宰臣文彥博上第一表乞解重任不允批答
賜新除行刑部尚書依前觀文殿大學士知陳
州劉沆讓恩命不允詔

賜中書門下戒僭奢詔

除宋庠制

除李昭亮制

除梁適制

除許懷德制

賜樞密使宋庠讓恩命第一表不允批答

賜樞密使宋庠讓恩命第二表不允斷來章批

答

賜樞密使宋庠讓恩命第一表批答口宣

賜樞密使宋庠并河陽三城節度使判河南府

文彥博加恩告勅口宣

賜河陽三城節度使同中書門下平章事判河

南府文彥博加恩告勅詔

賜宰臣富弼乞退不允批答

賜外任臣寮進奉助祿享銀絹等勅書

賜觀文殿學士禮部尚書王舉正乞致仕不允
詔

賜步軍副都指揮使涇州觀察使秦鳳路副都

部署王凱赴闕茶藥口宣

賜步軍副都指揮使涇州觀察使秦鳳路副都

部署王凱赴闕生料口宣

閤門賜許懷德張茂實告勅口宣

賜觀文殿學士禮部尚書王舉正乞致仕不允

詔

賜馬步軍副都指揮使張茂實赴闕生料口宣

賜相州觀察使劉從廣進奉乾元節馬詔

賜觀文殿大學士尚書戶部侍郎知定州龐籍

乞退不允詔

賜河陽三城節度使同中書門下平章事判河

南府文彥博辭加恩不允詔

賜樞密使檢校太尉同中書門下平章事宋庠

讓恩命第二表不允斷來章批答口宣

賜侍衛親軍馬軍副都指揮使張茂實讓恩命
不允詔

賜新除建雄軍節度使依舊殿前都指揮使許
懷德讓恩命第二表不允斷來章批答

賜起居舍人知制誥劉敞等獎諭詔

賜刑部郎中充天章閣待制錢象先等獎諭詔

賜屯田員外郎國子監直講梅堯臣獎諭勅書

賜西京作坊使知麟州王慶民獎諭勅書

賜新除建雄軍節度使殿前都指揮使許懷讓

讓恩命第一表不允批答口宣

賜新除建雄軍節度使殿前都指揮使許懷德

讓恩命第二表不允斷來章批答口宣

賜觀文殿學士尚書右丞田况乞致仕不允批

答

賜樞密使山南東道節度使同中書門下平章

事賈昌朝生日禮物口宣

賜樞密副使右諫議大夫張昇乞解罷第一表

不允批答

除文彥博易鎮判大名府制

除李昭亮檢校太保判定州制

除李端懿寧遠軍節度使知澶州制

賜禮部侍郎參知政事曾公亮乞罷不允詔

賜新除寧遠軍節度使李端懿讓恩命第一表
不允斷來章批答口宣

閤門賜新除寧遠軍節度使知潭州李端懿告

勅口宣

賜新除工部尚書知秦州張方平陳讓不允詔

賜樞密副使尚書禮部侍郎程戡乞退休第二
表不允批答

賜宰臣富弼第二表乞退不允批答

賜宰臣富弼乞退第四表不允斷來章手詔

賜樞密副使張昇生日詔

賜荆湖北路救濟飢民知州獎諭勅書

賜河陽三城節度使同中書門下平章事文彥

博進奉謝袷享加恩詔

賜定國軍節度使知并州梁適進奉謝恩馬詔

賜觀文殿大學士知定州龐籍進奉謝恩馬詔

賜虔州觀察使定州路副都部署劉渙進奉謝

恩馬詔

賜定國軍節度使梁適進奉謝恩馬詔

賜外任臣寮進奉賀禧享禮畢勅書

賜翰林學士尚書兵部員外郎知制誥吳奎乞

知青州不允詔

賜新除宣徽南院使檢校太保鄜延路馬步軍

都部署經畧安撫使判延州程戡讓恩命第

一表不允斷來章批答

賜知建昌軍楊儀進奉銀珠稻米勅書

賜右諫議大夫知梓州呂居簡進奉乾元節無

量壽佛一燈勅書

賜新除翰林學士依前禮部郎中知制誥權知

開封府蔡襄上表乞依舊知泉州不允詔

賜屯田員外郎王公衮獎諭勅書

賜宰臣富弼上第一表乞解罷機務不允批答

賜宰臣富弼上第三表乞解罷機務不允斷來

章批答

撫問護塋使何傳式詔

撫問西京并汝州路附塋隨護宗懿已下勅書

撫問尚宮沈氏勅書

撫問西京并汝州路管勾修墳并沿路巡檢道

路及管勾一行靈輦程頓排辦等朝臣使臣

內臣等勅書

賜新除觀文殿學士禮部侍郎孫沔詔

嘉祐三年

正月十七日

勅孫沔省所上表伏蒙聖慈差使臣賫到誥勅各一道授臣觀文殿學士禮部侍郎并賜對衣金帶鞍轡馬錢五百貫文不敢恭受伏乞特改差臣知一小郡或依例除一官致仕陳乞事具悉卿蔚有敏材膺予簡任外分邊寄嘗著於恩威入贊國機早參於帷幄風猷甚美寵遇既優適當擇帥之初方鑒用謀之失是惟慎舉實允僉諧豈宜圖自便之私而罔體眷懷之意顧茲重地難久曠官往祇成命之行當畧好論

之節所讓宜不允依前降指揮疾速發赴本任故茲詔示想宜知悉

賜知潁州徐宗况進奉賀交國公主出降銀絹馬等勅書

勅徐宗况省所進奉賀交國公主出降絹五百疋事具悉詩稱王姬之下嫁國著嘉禮而有儀惟臣職之幸脩備物容而叙慶誠勤所至歎尚良深茲示諭想宜知悉冬寒汝比好否遣書指不多及

賜知建昌軍沈造勅書

勅沈造省所進奉銀珠稻米一十石計一百貫絹袋

事具悉汝職守軍符政兼民穡樂此有秋之實擇其
嘉穀之英式陳常貢之儀彌體恪官之意故茲示諭
想宜知悉冬寒汝此好否遣書指不多及

賜給事中叅知政事曾公亮生日詔 一月三

十五日

卿蔚有時望叅于柄臣惟倚注之所深在眷顧之尤
異屬茲誕日宜爾壽期膺此寵頒體予至意

賜翰林學士兼侍讀學士尚書戶部郎中知

制誥知審刑院胡宿詔 二月三日

勅胡宿省所奏據大理寺日奏司申二月二十一日

已前下寺公案並已斷奏了畢無見在事具悉朕欲
斯民足衣食知禮讓而竊攘爭鬪之獄猶滋欲吾吏
慎刑罰盡情僞而傳予輕重之文不一卿以儒學之
職總評讞之繁克勤其官曾不留事實副予意惟時
可嘉若乃使天下囹圄空虛而風流篤厚是亦論思
獻納者之志其勉助我以共臻焉仍依奏宣付史館
故茲獎諭想宜知悉

賜判大理寺陳太素并權少卿楊開及審刑
院詳議官大理寺詳斷官等勅書 三月三日

勅陳太素省知審刑院胡宿奏據大理寺日奏司申

二月二十一日已前下寺公案並已斷奏了畢無見
在事刑獄之重一成而不遷此類之微可疑者甚衆
汝好學而敏莅官以勤夫俾天下之無冤幾刑錯而
不用此朕翼翼希慕之所未及而爾孜孜厥職之所
不忘者也故茲獎諭想宜知悉

賜知舒州齊廓進新茶并知廣德軍浦延熙
進先春茶勅書

勅齊廓省所進奉新茶一銀合合重五十兩緋羅夾
襪全事具悉百物茂生取新爲貴羣方修職効貢以
時汝守土有方事上惟恪閱茲來獻用體勤誠故茲

示諭想宜知悉

賜外任臣寮進奉乾元節銀絹馬勅書

勅高易簡省所進奉乾元節絹五百疋事具悉汝夙
以敏材膺于東寄及此奉觴之節載陳任土之儀能
因物以達誠見事君之甚恪省閱于再歎嘉不忘故
茲示諭想宜知悉

賜彰信軍節度使檢校太保同中書門下平
章事判大名府李昭亮乞知西京不允詔

勅昭亮省所上表乞移判河南府事具悉朕惟魏洛
之重皆爲別都將率所居難於屢易卿以中外勤勞

之績有撫綏扞禦之材自膺寄任之雄方厚倚毗之意遽茲列奏嘉乃好謙宜體眷懷靖安爾位所乞宜不允故茲詔示想宜知悉夏熱卿比平安好遣書指不多及

賜宣徽南院使淮康軍節度使張堯佐乞知

西京不允詔 五月二日

勅堯佐省所奏臣皇祐三年內授宣徽南院使判河陽軍州事未滿任蒙詔赴闕供職至今六載自量尸素深不遑寧近知西京闕人未有除授伏望特賜差委事具悉宜導徽猷任親而事簡居留京邑地要而務繁惟予眷遇之臣方處清閑之職載披來牘深講乃誠雖奮其聰明尚足以臨蒞而待我者艾宜有以優游實嘉盡瘁之心難徇撝謙之意所乞宜不允故茲詔示想宜知悉

賜宰臣文彥博上第一表乞解重任不允批

答 五月十八日

夫知其人之爲賢任則勿貳事其君而有道去不可輕此古昔臣主之明舉措必慎所以收功於一時而垂法於後世也卿夙有時望爲予柄臣自復秉於國鈞僅三周於歲序若乃進退賢否誅賞罪功每於聽

納之間敢忘虛已顧彼搢紳之論曾靡異辭方期有成以副予意而乃過形謙損思避台衡豈寡德弗明於用才而不盡將多言害正致厥位之難安苟異於斯夫何引讓矧卿忠信之節足以叶予之一心材謀之優可以斷予之大事茲所東注寧煩諭言所請宜不允

賜新除行刑部尚書依前觀文殿大學士知

陳州劉沆讓恩命不允詔

四月五日

卿嚮以宰弼之崇屢形懇避居留之任因用均勞而休風藹然嘉問時至方深眷倚遽閱奏封顧惟陪輔之邦俾遂便安之請增之美秩優我舊臣豈祇循於故常盖以示夫褒寵膺受之際逡巡以辭雖言匪飾文見於能讓而令行已出難矣復還其體余懷往禱新命

賜中書門下戒僭奢詔

五月四日

勅中書門下朕纘承丕基撫有方夏謂教之不可以家至而行之每務於身先惟是儉勤敢忘勉勵期與羣庶臻于富康而人殆久安驕於佚欲物豐太盛耗以浮虛苟奉養以自私忘僭奢之為戾士民交黷貴賤靡分惟其疆力之能無復等威之制考於著令雖

有舊章顧在攸司鮮聞用法民遂安於常習弊罔革以滋深紀綱旣紊於度程風俗以至於流蕩俾朕有欲治之意不能副余之誠心而民多自陷之愚未免煩余之訓導夫令信由於貴始下化先於上行眷予一二之臣其率庶工而警職俾爾多方之衆勿踰常憲以干刑庶漸革於侈風以共趨於治路凡居室之制器用之度冠服之章妾媵之數其令中外臣庶遵守前後條詔如有違犯仰御史臺及開封府糾察聞奏其諸路州軍即委轉運使提點刑獄臣寮及逐處長吏施行布告中外咸使聞知故茲詔示想宜知悉

除宋庠制

加恩進封

門下盡其志以饗親因而優惠爵于朝而示衆所以褒功考祭典而可稽著國章而有舊矧乃樞機之任惟余鼎鼐之臣劬事齊莊宣力左右方此慶行之始宜推寵數之隆推忠協謀同德佐理功臣樞密使開府儀同三司檢校太尉行兵部尚書同中書門下平章事兼羣牧制置使上柱國廣平郡開國公食邑七千八百戶食實封二千九百戶宋庠履行清純器識深茂夙有佳譽蔚爲名臣文足以爲國華學足以謀王體入則登乎三事備整謨猷出則斁于大邦藹存

風績自還機務頗歷歲時秉一德以協恭出處不更其守展四體而盡瘁夙夜匪懈其勞屬盛禮之有成廣推恩而自近按夫輿地特啓於新封加以寵名蓋遵於故事惟是便蕃之錫式伸眷倚之懷於戲君子者邦之基大臣者民之表搢紳之望所屬老成德業之隆豈煩多訓服我休命往惟欽哉可特授依前檢校太尉行兵部尚書同中書門下平章事兼羣牧制置使充樞密使特封莒國公仍賜推忠協謀同德守正佐理功臣散官勳食實封如故主者施行

除李昭亮制加恩

門下朕卜吉孟冬躬薦清廟祖考來格既以百福之多慶賜遂行均于四海之廣惟予將相之任是謂股肱之良宜擇剛辰誕揚休命忠果守正佐運翊戴功臣彰信軍節度曹州管內觀察處置等使開府儀同三司檢校太保同中書門下平章事持節曹州諸軍事行曹州刺史上柱國隴西郡開國公食邑一萬一千五百戶食實封三千四百戶李昭亮志尚純慈資識敏明世蒙舊德之餘早邁重熙之盛備于器使奮厥材猷好學詩書知將率之爲體兼推威信撫士卒以克和入則有宿衛之勤出則著扞城之効寄之方

一面屢守於要藩班乃政條頻聞於佳譽乃眷別都之
重實司留鑰之嚴擁節秉均並享崇高之貴治戎撫
俗兼資鎮靜之材茲惟圖任之艱方屬倚毗之意是
用因霽恩之浹洽推異數之便蕃廣乃䟽封增其真
戶仍疇美績褒以嘉名於戲秉德不回所以見始終
之操好謙自守乃能居寵祿之榮汝其欽哉膺此優
渥可特授依前檢校太保同中書門下平章事使持
節曹州諸軍事行曹州刺史充彰信軍節度曹州管
內觀察處置等使加食邑七百戶食實封四百戶仍
賜推誠保德守正佐運翊戴功臣散官勳封如故主

未施行

除梁適制

特授特進加恩

門下王者嚴其宗廟饗必及其時盡其誠心祭則受
其福朕躬執圭瓚率諸臣工因百物之成冬格列聖
而合食嘉與有位之衆均茲錫祉之繁矧惟槐鼎之
舊臣實繫國家之大體宜優新命以告外庭推誠保
德忠亮翊戴功臣定國軍節度同州管內觀察處置
等使光祿大夫檢校太傅使持節同州諸軍事同州
刺史兼御史大夫上柱國安定郡開國公食邑四千
七百戶食實封一千五百戶梁適世胄之華早躋仕

路藝文自奮繼踐辭科進階顯榮亟被獎擢優游侍
從之列嘗奉於清間出入中外之勤實勞於夙夜既
贊樞府遂登宰司啓沃之謀話言猶在進退之際禮
遇無隆自歷藩垣頗更歲月近惟大鹵實宿勁兵俾
分節制之權以爲方面之重撫茲雅俗藉爾敏林屬
熙事之有成均慶恩而方洽是用敘陟崇階之貴兼
增食戶之多推茲寵章蓋率舊典於戲執忠信之一
節所以事君守富貴而不驕乃能終吉是惟素學寧
假訓辭往服茂恩當體予意可特授特進依前檢校
太傅使持節同州諸軍事行同州刺史兼御史大夫
充定國軍節度同州管內觀察處置等使加食邑七
百戶功臣勲封食實封如故主者施行

除許懷德制

加恩

門下賞以懋功俾有能之知勸祭之爲澤思在位以
咸均嘉盛禮之斯成務推恩而惟庶矧乃者明之哲
是爲心膂之臣宜示優隆式揚誕告衛聖忠果雄勇
翊戴功臣殿前都指揮使保寧軍節度婺州管內觀
察處置等使特進檢校尚書左僕射使持節婺州諸
軍事行婺州刺史兼御史大夫上柱國潁川郡開國
公食邑五千戶食實封一千二百戶許懷德勁勇之

質蓋稟天姿忠厚之良自爲國器少有四方之志出
逢千載之辰蘊其材謀能自奮勵訓我士卒號令之
信甚明爲予爪牙介冑之色難犯爰採軍中之譽俾
分閫外之權遂膺施節之榮專董貔貅之旅宿衛宮
禁周旋歲時宣力甚勤有知無不爲之節盡瘁後已
加老而益壯之心誠未耗於精明豈但矜於矍鑠屬
受輦之均慶方浹宇以蒙休載推圖舊之懷式叙疇
勞之典益其封食錄乃功庸於戲享爵祿之崇高荷
寵靈之優渥挺金石不渝之操茲惟事上之誠知富
貴克守之難用保有終之吉勉矣來効徃其欽哉可

特授依前檢校尚書左僕射使持節婺州諸軍事行
婺州刺史兼御史大夫充殿前都指揮使保寧軍節
度婺州管内觀察處置等使加食邑七百戶食實封
三百戶仍賜衛聖忠果雄勇宣力翊戴功臣散官勳
封如故主者施行

賜樞密使宋庠讓恩命第一表不允批答

朕以因時致享克展於孝思已祭受輦大均於慶澤
乃眷者明之哲實予體貌之臣肅臨事之有容旣交
神而蒙貺宜推異數以示眷懷雖嘉好謙曷止成命
所讓宜不允

賜樞密使宋庠讓恩命第二表不允斷來章
批答

卿蘊純和端慤之誠富敏瞻通明之學惟時舊德實
我柄臣當祀事之有成廣慶恩而方洽疇其封爵錫
以號名茲爲寵章蓋舉常典無煩避讓其往欽承所
讓宜不允仍斷來章

賜樞密使宋庠讓恩命第一表批答口宣
熙事旣成方大均於祭澤寵章所異宜首及於樞臣
當即往膺勿煩中讓

賜樞密使宋庠并河陽三城節度使判河南

府文彥博加恩告勅口宣

朕以饗親致孝駿惠均恩宜有寵章以褒舊德往欽
新命當體眷懷

賜河陽三城節度使同中書門下平章事判

河南府文彥博加恩告勅詔

朕因孟冬之吉辰饗太宮而合食膺受神貺推行慶
恩眷惟同德之臣方處居留之任宜優異數少示眷
懷旣敷告於外庭其往祇於休命

賜宰臣富弼乞退不允批答

夫知人之明可謂難矣而任賢之術茲豈易哉若乃

聽之不聰信之不篤施設之方未盡弗極其材遲速之効有時莫能少待則被其任者實亦艱歟卿以純一忠亮之誠蘊宏深遠大之業朕虛已以聽推心仰成至於一二之臣是惟同德下逮衆多之論曾靡間然方將甄叙賢愚修明法度務究本根而更治不求歲月之近功期於有成茲乃予意柰何中道而將止夫亦奚託以爲辭矧上下旣交寧有不通之志而君臣相遇豈爲易得之時當體余懷勉安厥位所乞宜不允

賜外任臣寮進奉助祿享銀絹等勅書

朕十言孟冬合食清廟禮樂交舉臣工畢從嘉守土之修官咸以時而來助各以其物粲然在庭載省勤誠良深歎尚

賜觀文殿學士禮部尚書王舉正乞致仕不

允詔十一月十四日

大朝廷之廣大賢儒之衆多必有皤然耆壽之臣以當上所優禮之異或事思所訪則有老成俾時之老瞻以爲人望故禮雖七十猶有不得謝者焉卿懿文高行有君子之風清節令聞爲當世所重閱書秘室日侍清閑進讀經筵坐論道德固非有官司之責

力之勞宜思少安副我眷待

賜步軍副都指揮使涇州觀察使秦鳳路副

都部署王凱赴闕茶藥口宣 六月二十五日

卿祇膺召節方屆都畿載惟道路之勤屬此炎薰之候宜頒良劑式示眷懷

賜步軍副都指揮使涇州觀察使秦鳳路副

都部署王凱赴闕生料口宣 同日

卿出膺邊寄入恪觀容顧就館以云初方奉圭而來見宜頒餼勞式示眷懷

閣門賜許懷德張茂實告勅口宣

卿素稱忠勇備著勞能俾更旄節之榮仍董貔貅之旅往膺寵命其體眷懷

賜觀文殿學士禮部尚書王舉正乞致仕不

允詔 十一月二十九日

卿精深之學足以待問清懿之望足以鎮浮嚮從守藩念遠賢之在外來侍經席冀開予於未聞惟道德之所資非者舊而誰處雖引年之制禮固有常而愛老之心予寧敢怠所宜勉近醫藥輔安精神期臻壽康以副虛符所乞宜不允

賜馬步軍副都指揮使張茂實赴闕生料口

宣 十二月六日

卿遠趨召節方屆都城惟茲餼品之豐式舉彝章之舊往祇寵錫式體眷懷

賜相州觀察使劉從廣進奉乾元節馬詔

卿蔚有敏材膺于寄任遠瞻壽節劾乃誠勤在庭之獻肅陳事上之忠可見省閱之際嘉歎不忘

賜觀文殿大學士尚書戶部侍郎知定州龐籍乞退不允詔

勅龐籍省所劄子奏以年齒衰殘自去年七月後累奉表及劄子輸瀝懇誠尋蒙差知定州亦曾面告祇

乙一年許賜請老歸第伏均卓賜差人承替得遂
其手具悉夫難進易退雖士節之甚美而尚賢使老
亦朝家之所先故禮稱引年而有不得謝卿以備德
為時舊臣東於予衷任以方面材猷甚壯視聽方強
矧夫邊堠無虞民事尤簡固可以偃息藩屏養願精
神而遠慕昔賢願還官政雖止足之意誠可尚於高
懷而眷遇之深難遽從於來請所乞宜不允故茲詔
示想宜知悉冬寒卿比平安好遣書指不多及

賜河陽三城節度使同中書門下平章事判

河南府文彥博辭加恩不允詔 十一月十七日

勅彥博省所上表陳讓裕享禮畢加恩事具悉朕屬
者潔齊精誠薦見宗廟蒙神之貺受福孔多推慶賜
以代行均中外而咸及矧我同德乃時舊臣惟體貌
之隆宜加於異數而褒優之意未稱於予衷嘉讓節
之甚勤顧成命之難止所讓宜不允故茲詔示想宜
知悉冬寒卿比平安好遣書指不多及

賜樞密使檢校太尉同中書門下平章事宋
庠讓恩命第二表不允斷來章批答口宣
卿陪祀疇勞啓封加命丹形懇讓深識冲懷顧定志
之弗移宜承命而毋忽

賜侍衛親軍馬軍副都指揮使張茂實讓

命不允詔 十二月十五日

卿蔚有材武稱於周行早罄忠力膺予寄任自分齊
敏屢易名邦俾更節制之權入總禁嚴之旅扞城宿
衛皆汝職焉載閱來章雖嘉讓節趨祇成命宜體眷
懷所讓宜不允

賜新除建雄軍節度使依舊殿前都指揮使

許懷德讓恩命第二表不允斷來章批答二十

月五日

卿拔從行伍之微董我師徒之衆嘉爾勞舊優之寵

榮乃思功效之未彰能形避讓之冲懇已行之命其
往欽承事上之忠無或怠忽所讓宜不允仍斷來章

賜起居舍人知制誥劉敞等獎諭詔

十二月九日

勅劉敞省所進裕享詩事具悉裕大祭也禮又闕焉
朕因時孟冬躬薦圭鬯永惟祖考之烈格于天地禮
樂之盛昭乎物容宜有儒學之臣形為頌歎之美卿
議論閎博辭章爛然敷訓告以代予言是惟其職發
揄揚而稱上德聊見餘才省閣已還嘉尚良切故茲
獎諭想宜知悉

賜刑部郎中充天章閣待制錢象先等獎諭

詔 十二月九日

勅象先省所進裕享詩事具悉裕大祭也禮又闕焉
朕因時孟冬躬薦圭鬯永惟祖考之烈格于天地禮
樂之盛昭乎物容宜有儒學之臣形為頌歎之美覽
奏篇之來上慶熙事之有成文采可觀歎嘉于再故
茲獎諭想宜知悉

賜屯田員外郎國子監直講梅堯臣獎諭勅

書 十二月九日

勅梅堯臣省所進裕享詩事具悉汝行懿而粹學優
而純以詩自名為衆所服矧乃詠祖宗之功德述禮

樂之聲容宣被朱絃以薦清廟載披來獻深用歎嘉
故茲獎諭想宜知悉

賜西京作坊使知麟州王慶民獎諭勅書二十
月十七日

勅王慶民省所奏準密院劄子節文以臣撰成麟府
一州緝圖一面并序目二冊詣闕上進事具悉古之
用兵者必因地形制方略然後可以策勝敗之筭運
竒正之謀爾以材武之資有敏明之識自膺東寄出
守邊封而能周知山川險易之形歷覽亭障屯防之
要列爲凡目粲爾條陳不惟指掌於披圖足以因時
而制變遽茲來上深體乃忠省閱以還歎嘉曷已故
茲將獎諭想宜知悉

賜新除建雄軍節度使殿前都指揮使許懷
德讓恩命第一表不允批答口宣

卿以宿衛之勤勞能備著俾移使節式示眷懷宜體
優恩勿持堅讓

賜新除建雄軍節度使殿前都指揮使許懷
德讓恩命第二表不允斷來章批答口宣

卿夙推材武久擁節旄俾易名藩用伸優遇無煩固
避徃服新恩

賜觀文殿學士尚書右丞田况乞致仕不允
批答

卿德量足以容衆材識足以濟時蔚然君子之風綽
有大臣之體自嬰疾恙求解樞機朕心惻然深以爲
惜乃惟書殿之清職自非耆哲而弗若俾從優游以
便願養所期福善之理當蒙勿藥之休還來輔予以
盡賢業遽形引謝良異眷懷所乞宜不允

賜樞密使山南東道節度使同中書門下平
章事賈昌朝生日禮物口宣 九月五日

卿位峻樞庭望崇舊老屬誕期之斯及顧寵數以宜
優體乃眷懷膺茲蕃錫

賜樞密副使右諫議大夫張昇乞解罷第一
表不允批答 正月二十九日

朕惟一二左右之臣出納樞機之命必有同德爲時
老成卿質厚器閎材優識敏風力甚勁晚而不衰議
論有稽言而必中朕所體貌民之具瞻豈宜退狗謙
冲自厭繁務盡瘁事國矧惟素懷推心仰成當體予
意所乞宜不允

除文彥博易鎮判大名府制 二月十五日

門下朕惟將相之崇資是爲文武之極選隆其名器

所以重朝廷列于藩宣所以屏王室矧乃居留之任
必屬老成之人爰擇剛辰敷告有位具官文彥博器
閎而厚識粹而明學得其方通古今而知要才周於
物適大小以惟宜自奮發於聲猷早更揚於中外居
則參禪乎國論出則宣暢乎皇威兩踐台司首當柄
用賢愚式序舉百職以咸修綱紀甚明贊萬機而至
悉懇避鈞衡之任出司管鑰之嚴逮此逾時蔚然休
問眷言邦哲實簡予衷是用更其擁節之榮委以別
京之重勁兵所宿實資總制之權雅俗惟淳兼賴撫
綏之政於戲與國同體是謂股肱之良惟民具瞻方
隆師尹之望顧我舊德豈煩訓辭往其欽哉祇服休
命可特授依前檢校太師同中書門下平章事潞國
公行陝州大都督府長史充保平軍節度使判大名
府兼北京留守司事充大名府路安撫使加食邑七
百戶食實封五百戶功臣散官勲封如故仍放謝辭
發赴本任主者施行

除李昭亮檢校太保判定州制

二月十五日

門下嚴師律以宣威是爲將率之事謀王體而坐論
必屬廊廟之臣惟二柄之是兼蓋一時之首選顧於
寄任宜副倚毗爰告外庭式揚休命具官李昭亮資

質純厚器識通明世有勲庸蔚為舊德家傳韜畧濟
以美材爰自壯齡早膺獎擢訓齊士伍號令信於恩
威宿衛朝廷勤勞著於夙夜屢被藩宣之寄實資鎮
撫之才惟留鑰之別都乃宿兵之重地歲時滋久譽
望益嘉眷言中山還爾舊治是用易以將旄之寵增
其帝傅之崇於戲宣國威靈用綏寧於邊鄙求民疾
苦以班布於教條俾無北顧之憂惟我老成之倚往
踐厥位時惟欽哉可特授檢校太傅依前同中書門
下平章事行兗州大都督府長史充泰寧軍節度使
充定州路都部署兼安撫使判定州加食邑七百戶
食實封三百戶功臣散官勲封如故仍放謝辭發赴
本任主者施行

除李端懿寧遠軍節度使知澶州制

同日

門下至治之時常不忘於武備用兵之要在先擇於
將臣禮樂詩書必資於學智信嚴勇又無以仁是惟
難才豈不慎選用諏剛日敷告外庭具官李端懿器
質宏深資識敏茂地聯近戚無富貴之驕世濟美材
躬儒素之行粵從壯歲綽有令名學問足以與謀忠
信可以事上而能克勵名節靡違宴安每思報國以
有為嘗請治民而自効比州之政稱最東土之人甚

思惟留務之是居顧歷時而頗久俾加褒進爰考僉
同是用寵以節旄委之藩翰於戲爲政而先無擾所
以靖民除戎以戒不虞是宜有素繫乃通明之畧副
予東任之懷往惟欽哉膺此休渥可特授依前檢校
刑部尚書充寧遠軍節度使知澶州加食邑七百戶
食實封二百戶散官勳封如故主者施行

賜禮部侍郎參知政事曾公亮乞罷不允詔
二月十八日

卿以敏識精學參贊萬務雋德茂行表儀百僚而思
慮之勞偶嬰疾恙藥石之効聞比康平嘉謀話言日
以虛佇封章屢上引避甚堅豈未體於眷懷而每慮
於開諭宜專輔養以副倚毗所乞宜不允

賜新除寧遠軍節度使李端懿讓恩命第一
表不允斷來章批答口宣 同日

卿聯國懿戚惟時美材久居留使之權俾委將旄之
任載嘉冲挹思避寵榮宜體眷懷無煩牢讓

閤門賜新除寧遠軍節度使知澶州李端懿
告勅口宣 同日

卿地胃聯華資材甚茂早膺器使頗著聲猷俾進總
於中權式增榮於戚里所宜祇服以體眷懷

賜新除工部尚書知秦州張方平陳讓不允
詔 三月十六日

卿識茂器閎智優學博施於有用謂靡不宜乃眷西
隴最爲重地惟撫綏備禦之任必通明敏給之才予
難其人於爾爲得委遇之意則惟其勤避讓之誠夫
何于再勉祇其往當體朕懷

賜樞密副使尚書禮部侍郎程戡乞退休第
一表不允批答 三月十六日

朕惟朝廷之體廣大材賢之士衆多必有耆哲之臣
以爲時望之重卿早被獎擢藹然華猷參聯鈞輔之
榮煥贊樞機之要履躬之懿久見於純誠事上之忠
志期於盡瘁顧方深於毗賴而懇避於寵榮封章繼
來敦諭亦至引年以禮雖嘉止足之賢優老虛懷未
忘眷遇之意往安厥位宜體予衷所乞宜不允

賜宰臣富弼第二表乞退不允批答

卿事君一心憂國百慮簡拔寒俊而多得遺才慎重
賞刑而惟恐過舉蔚然德業方厚倚毗而綱憲之司
異同興論或事非大體或言涉難明因其摭撫於至
微益見始終之無過雖開廣言路務在兼容而進退
大臣豈當緣此所宜篤卿自信之志成朕不惑之明

渙然無疑來復厥位所乞宜不允

賜宰臣富弼乞退第四表不允斷來章手詔
省四上表乞解機務事具悉朕力排讒構之言無採
措紳之望委卿以重任待之以不疑惟致治之至難
方同心而共濟勉以無怠庶幾有成而執法之臣以
言爲職議旣不一理難必從遂其好勝之私因於積
忿而發事緣曖昧語涉中傷遽罷憲司以釋群惑雖
朕之不明不敏旣能爲卿而辨之而卿亦何嫌何疑
遂將去朕而不顧避辭已確敦諭亦勤其體予懷復
安爾位使天下曉然知朕任賢而勿貳也所乞宜不

允仍斷來章什富弼

賜樞密副使張昇生日詔

卿以業履之清優任樞機之密勿余所禮遇時之具
瞻爰屆誕辰俾加慶賜

賜荆湖北路救濟飢民知州獎諭勅書

夫修人事所以禦天災安吾民豈不在良吏爾學優
從政職任治人因凶歲之疫飢體詔書之隱惻旣免
罹於殍殍仍不夭於札瘥再惟敏事之材深得卹荒
之禮第課來上予心所嘉宜有褒章以旌善績

賜河陽三城節度使同中書門下平章事文

彥博進奉謝袷享加恩詔

詩云君子邦之基記曰夫臣民之表子所寵異禮宜
優隆乃因祭福之均恩首效駿良而來獻載惟誠恪
深用歎嘉

賜定國軍節度使知并州梁適進奉謝恩馬

詔

大鹵之雄中權為重時有舊老東于予衷寵之旋無
之榮委以藩宣之寄效駿良而來獻將誠慈之甚勤
省覽已還歎嘉曷已

賜觀文殿大學士知定州龐籍進奉謝恩馬

詔

言致之職號為清優舊德之臣所宜寵異乃求駿足
以副勤誠曾非貴物之心實體事君之節省閱于再
數獎不忘

賜虔州觀察使定州路副都部署劉渙進奉

謝恩馬詔

國家慎選材武委之事權優其寵榮所以責効厚其
頒予所以養廉乃因物以達誠見事上之惟恪有閱
于再歎嘉不忘

賜定國軍節度使梁適進奉謝恩馬詔

卿惟時舊德爲國將臣推恩典以旣優俾家庭之增
寵乃輸良貢以効誠勤省閱以還歎嘉彌切

賜外任臣寮進奉賀祫享禮畢勅書

朕以孟冬卜吉大祭伸虔惟熙事之旣成實庶邦之
共慶載披來貢深見輸忠省閱以還歎嘉良切

賜翰林學士尚書兵部員外郎知制誥吳

乞知青州不允詔

卿強學博覽足以通古今嘉謀讜言足以承顧問朝
夕獻納余有望焉矧方委之劇煩嬰以事任懋乃賢
業宜有施於朝廷奮乎壯猷豈暇便於鄉里其安爾

賜深體眷懷

賜新除宣徽南院使檢校太保鄜延路馬步
軍都部署經畧安撫使判延州程戡讓恩命
第一表不允斷來章批答

迺者卿數上封章懇辭樞要兼引年而爲請思還政
以自顧眷惟耆舊之英誠久劇繁之任俾增書殿之
職仍參講席之聯是日清優豈忘顧遇而進見之際
聰明未衰迺遷使領之華徃重邊陲之寄予意所屬
僉言允諧雖冲尚之可嘉惟成命之難止所讓宜不
允仍斷來章

賜知建昌軍楊儀進奉銀珠稻米勅書

勸力農而務本惟汝之官登嘉穀以告豐乃時之瑞
粲然良實來效貢囊載惟修職之勤式緩憂民之意
省閱于再歎尚不忘

賜右諫議大夫知梓州呂君簡進奉乾元節
無量壽佛一幅勅書

壽觴紀節罄率土以均歡妙像有儀獻無疆之善祝
嘉乃愛君之意見於事上之恭省閱以還歎嘉良切

賜新除翰林學士依前禮部郎中知制誥權
知開封府蔡襄上表乞依舊知泉州不允詔

卿學通古今足以備獻納政適寬猛足以臨劇熯
得材之難顧常勞於選任矧居外茲又寧自逸於
安是宜勉旃來服新命綽有餘力夫何微疾之辭居
然寵名固為榮養之樂其毋必讓當體至懷

賜屯田員外郎王公衮獎諭勅書

嚮者長人之官備盜不謹害我命吏驚茲遠民汝於
斯時能奮厥効督捕甚急饋餉有方致茲兇徒卒就
擒戮第功來上覆實不虛載嘉勤勞深用褒歎

賜宰臣富弼上第一表乞解罷機務不允批

答

夫宰相之事非可以歲月考而一二數也其在朝廷
選賢任能而各得其職下俾民俗遷善遠罪而不知
其然至於法度修紀綱正然後相與慎守而安行之
以臻于治此朕所以虚心一意日有望於卿者也今
事有緒而卿辭焉豈朕德之不明將顧時之不可中
道而止夫何謂哉俾予獲用材不盡之譏而卿涉苟
安自便之計予所不取卿其勉焉所乞宜不允

賜宰臣富弼上第三表乞解罷機務不允斷
來章批答

卿博通古今之學深達治亂之原德業之隆名稱甚
盛朕方虛已而任不愧知人之明而自秉鈞衡宜勞
夙夜惟是大小之政損益施設惟卿之爲罰罪賞功
進退能否惟卿之聽時有異論豈無多言一切屏之
惟卿之信若乃恭已南面庶幾輔予享其成功登于
至治亦惟卿之圖其三者人君之所難予罔敢忽其
一者在卿之不止庶克有成而無名屢辭實所難諭
卿其體茲至意究乃素懷所乞宜不允仍斷來章

撫問護羣使向傳式詔

葬之爲禮古所重焉方將事以在塗顧勞心於祗役
眷賴之意不忘于懷

撫問西京并汝州路拊葬隨護宗懿已下勅書

日月惟吉川塗匪遐顧襄事之有期嘉送終之盡禮
勞勤備至眷矚良深

撫問尚宮沈氏勅書

輜旌就道霜露戒時載惟將護之勞無怠祇勤之意
撫問西京并汝州路管勾修墳并沿路巡檢
道路及管勾一行靈輦程頓排辦等朝臣使
臣內臣等勅書

卜吉趨時送終備物顧風霜之方厲念事役之爲勞

歐陽文忠公全集卷一百二十九

歐陽文忠公全集卷一百三十

制勅口宣詔文七十首

賜宰臣陳執中生日禮物口宣

賜隴州團練使代州部署田辛等勅書

賜翰林學士尚書工部郎中知制誥王洙獎諭

詔

賜新除參知政事程戡讓恩命不允斷來章批

答

賜寧遠軍節度使張茂實進謝恩馬詔

賜新授龍神衛四廂都指揮使英州團練使郝

質勅書

賜尚書工部侍郎余靖詔

撫問江南東西路臣寮口宣

撫問鄜延路臣寮口宣

撫問真定府定州等路臣寮口宣

撫問保州路臣寮口宣

撫問北京并恩州臣寮口宣

賜鎮安軍節度使同中書門下平章事判陳州

程琳進奉乾元節詔

賜外任臣寮進奉乾元節銀絹馬等詔

賜樞密使河陽三城節度使同中書門下平章

事王德用生日禮物口宣

撫問河東路沿邊臣寮夏藥口宣

撫問麟府路臣寮及并代州路臣寮口宣

撫問宣徽南院使彰信軍節度使判真定府李

昭亮口宣

賜判大名府賈昌朝判陳州程琳判成德軍李

昭亮等進奉上壽金酒器一副馬六疋詔

賜鎮海軍節度使檢校太尉同中書門下平章

事判亳州陳執中讓恩命第二表不允仍斷

來章批答

賜新除宰臣富弼赴闕茶藥口宣

賜新除宣徽北院使檢校太保判并州王拱辰讓恩命不允仍斷來章批答

賜新除宣徽南院使檢校太保判延州吳育讓恩命不允仍斷來章批答

賜新除昭德軍節度使知鄆州龐籍赴闕生料口宣

賜新除昭德軍節度使知鄆州龐籍赴闕茶藥詔

賜新除宰臣文彥博讓恩命第二表不允仍斷來章批答

賜新除宰臣富弼讓恩命第二表不允仍斷來章批答

撫問真定府高陽關河東等路臣寮口宣

撫問邠寧環慶涇原鎮戎軍德順軍路臣寮口宣

賜鎮海軍節度使檢校太尉同中書門下平章事判亳州陳執中生日禮物口宣

賜右領軍衛將軍克冲獎諭勅書

賜鎮海軍節度使檢校太尉同中書門下平章
事判亳州陳執中詔

賜知建昌軍張貴和勅書

賜吏部尚書同中書門下平章事文彥博生日
禮物口宣

撫問麟府代州路臣寮口宣

賜侍衛親軍步軍副都指揮使涇州觀察使王
凱赴闕茶藥口宣

賜龍圖閣直學士給事中施昌言已下爲修河
了畢御筵口宣

賜鎮東軍節度觀察留後知潁州李端愿赴闕

茶藥詔

賜天章閣待制知揚州許元詔

撫問廣南西路臣寮口宣

除授陳執中行尚書左僕射充觀文殿大學士
依舊判亳州加食邑食實封餘如故仍放朝

謝制

宣召魯公亮口宣

撫問河北路臣寮諸軍將校口宣

撫問樞密直學士施昌言爲患口宣

撫問澶州滑州衛州通利軍梅摯等及存恤逐

州軍為水災及防護堤岸口宣

賜昭德軍節度使龐籍并武康軍節度使韓琦
龍神衛四廂都指揮使英州團練使郝質各
進奉端午馬詔勅

賜溪洞進奉乾元節并端午勅書

賜外任臣寮進奉乾元節功德疏詔勅

賜外任臣寮進奉助恭謝禮畢銀絹等詔勅

賜武康軍節度使韓琦到闕坐對口宣

賜新授四方館使依舊英州刺史馬懷德進奉

謝恩馬勅書

賜知池州包拯進奉石菖蒲一銀合勅書

賜新授觀文殿大學士行尚書左僕射陳執中

詔

賜新除資政殿大學士知青州孫沔告勅并對

衣鞍轡馬口宣

賜護國軍三軍將吏僧道百姓等為護國軍節

度使樞密使狄青罷政加平章事判陳州示

諭勅書

賜翰林學士尚書左司郎中知制誥權知審刑

院魯公亮詔

賜尚書刑部員外郎兼侍御史知雜事權判大理寺郭申錫等勅書

除劉沆特授行工部尚書克觀文殿大學士知應天府加食邑實封仍改賜功臣餘如故制賜新除同中書門下平章事判大名府依前彰信軍節度使李昭亮讓恩命不允詔

賜溪洞進奉助恭謝賀冬賀正水銀綿紬等勅書

賜樞密副使程戡生日詔

賜諸道州府軍監及四京恤刑詔勅

賜河北東西路邊臣夏藥及傳宣撫問口宣

賜昭德軍節度使檢校太傅知并州龐籍撫諭

戒勅詔

賜宰臣富弼上第三表乞退不允斷來章批答

賜交國公主陳讓恩命第三表不允斷來章手

詔

賜知乾寧軍高遵約獎諭勅書

賜樞密副使田况生日禮物詔

贈保順軍節度使張惟吉祭文

贈保順軍節度使張惟吉祭文

賜宰臣陳執中生日禮物口宣

有勅卿為時柱石秉國鈞衡爰逢慶育之辰宜有便蕃之錫豈惟故事式示眷懷今差卿男將作監丞世儒賜卿生日禮物想宜知悉

賜隴州團練使代州部署田辛等勅書

勅田辛省所進奉謝恩賜公使月俸馬一疋事具悉邊防有嚴寄任尤重嘉汝材武董吾兵師軍聲俾壯於威容寵數宜優於廩賜遽陳貢謝益認傾輸尚體眷懷勿忘自效故茲示諭想宜知悉秋冷汝比好否
書藉不多及

賜翰林學士尚書工部郎中知制誥王洙獎

論詔

勅王洙省監護使劉沆劄子奏繳連到少府監修製法物所狀修製溫成皇后一行法物勘會例各鮮明及減省得物料功限甚多事少府領五署之衆工乃九卿之舊職卿以儒學參吾侍從兼蒞其事能勤厥官俾夫功簡而速成物精而有法益彰材敏尤用歎嘉故茲獎諭想宜知悉

賜新除參知政事程戡讓恩命不允斷來章

批答

朕有欲治之心而甚勞思底治之方而未獲夙夜于此惟賢是求卿出入宣勤材望兼著誠明發於事業識慮可以詢謀而召自外邦參于宰府朕志所定其何可移夫任之重者憂實深遇之隆者報亦厚讓而後受雖敦難進而可嘉知無不爲其一乃心而圖效所讓宜不允仍斷來章

賜寧遠軍節度使張茂實進謝恩馬詔

勅茂實省所進奉謝恩賜公使并月俸及牌印到任馬共八疋事具悉卿出守蕃宣宜優祿給詔條方布受署有初印綬爲榮古人所重載披貢謝深用歎嘉

故茲詔示想宜知悉

賜新授龍神衛四廂都指揮使英州團練使

郝質勅書

勅郝質省所進奉謝恩授龍神衛四廂都指揮使英州團練使并賜公使月俸馬共二疋事具悉朕嘉汝有忠勇之材遂膺選擢豐汝以廩賜之厚實示眷懷貢奉所陳勤誠已著功名可勉後效其思故茲示諭想宜知悉

賜尚書工部侍郎余靖詔

蠢爾蠻蜒驚于海隅卿起自家居首宣勤力至於大

兵之後撫彼凋殘餘孽未平推吾恩信寄任實沫於
委遇寵章宜有於便蕃遠閱貢輸良增嘉歎

撫問江南東西路臣寮口宣

卿等並以材賢出分寄任荐更歲月備著勞能宜示
撫存以彰眷遇

撫問鄜延路臣寮口宣

卿等並膺東寄綽著才猷顧邊圉之肅然嘉王事之
勤止屬茲寒沍宜示撫存

撫問真定府定州等路臣寮口宣

卿等並韞時才出分邊寄屬新陽之戒候念宣力以

特示撫存體茲眷遇

撫問保州路臣寮口宣

卿等夙臨邊圉盡瘁公家當春序之方和念朔陟之
尚凜俾茲撫慰式示眷懷

撫問北京并恩州臣寮口宣

卿等並膺東寄方布教條惟夙夜之宣勤在眷懷而
彌切特加存撫宜體優隆

賜鎮安軍節度使同中書門下平章事判陳

州程琳進奉乾元節詔

誕祥著節延祝申誠顧予同德之臣首列充庭之貢

式彰勤蓋深用歎嘉

賜外任臣寮進奉乾元節銀絹馬等詔

夏時正候誕節戒辰惟事君之盡忠因效貢而申祝嘉乃勤意勿忘二

賜樞密使河陽三城節度使同中書門下平

章事王德用生日禮物口宣

卿勳闕名家樞機重任式因誕日用示優恩宜體眷懷膺茲蕃錫

撫問河東路沿邊臣寮夏藥口宣

卿等並膺寄任深東器能顧隆暑之惟時念禦邊之

宣力俾分珍劑式示眷懷

撫問麟府路臣寮及并代州路臣寮口宣

卿等蔚有時才並分邊寄顧蘊隆之在候嘉勤瘁以不忘式示撫存體茲東注

撫問宣徽南院使彰信軍節度使判真定府

李昭亮口宣

卿宣勞邊鄙頗歷歲時因乃子之言行俾過家而賜問式彰寵眷以耀私門

賜判大名府賈昌朝判陳州程琳判成德軍

李昭亮等進奉上壽金酒器一副馬六疋詔

載誕及辰萬邦咸慶顧乃蕃宣之重實惟者哲之明
休有物容來陳壽祝嘉乃誠意不忘于懷

賜鎮海軍節度使檢校太尉同中書門下平
章事判亳州陳執中讓恩命第二表不允仍
斷來章批答

卿自再司鈞軸未久歲時廼者數上封章願還印綬
朕惟委任之際古今所難知之不盡如不知用之不
終如不用所以悉格羣議獨斷余衷非惟勉爾以胡
恤人言亦庶幾乎任賢勿貳之意也而卿避讓之節
再三益堅事有重違理當俯徇夫進退以禮豈惟優

大臣堂陞俱隆蓋以尊人主是用寵爾以節旄之寄
兼之以槐鼎之榮雖為新恩實爾舊物出入中外載
嘉夙夜之勤待遇始終當盡君臣之分無煩封執用
體眷懷所讓宜不允仍斷來章

賜新除宰臣富弼赴闕茶藥口宣

卿祇若新恩式趨近甸炎歎方鬱衝冒良勤宜有頒
宣用伸眷遇

賜新除宣徽北院使檢校太保判并州王拱
辰讓恩命不允仍斷來章批答

宣導徽猷號為近職鎮撫方面實惟難才余思其人

於爾為得至於儒學雍容於顧問勤勞出入於劇繁
考資聖以孰先在甄陞而惟允辭讓之節誠雖可嘉
詢謀既同命則無易所讓宜不允仍斷來章

賜新除宣徽南院使檢校太保判延州吳育
讓恩命不允仍斷來章批答

卿學足以治人知足以謀事夙有問望稱于搢紳惟
時舊人嘗歷二府宣徽之職夫復何讓若乃居則道
古先之訓講朕以六經出則重朝廷之威撫余之遠
俗才無不可用之文武而皆宜惠無不為任以內外
而何異余考於衆僉惟汝諧所讓宜不允仍斷來章

賜新除昭德軍節度使知鄆州龐籍赴闕

料口宣

卿言秉覲圭庸臨畿甸屬此新商之序載嘉執轡之
勤宜有頒宣以彰寵待

賜新除昭德軍節度使知鄆州龐籍赴闕茶

藥詔

勅龐籍擁節之蕃飭車來覲顧都圻之庸及嘉跋履
之斯勞特頒飲劑之良以示眷懷之厚

賜新除宰臣文彥博讓恩命第二表不允仍
斷來章批答

朕躬儉約以先人而生民未足勤憂勞以勵政而
職多隳豈布德之不明抑任人之弗至是以齋居正
慮先志後占鑿屢易以爲煩念難知之可慎永惟商
周之所記至以夢卜而求賢孰若用搢紳之公言從
中外之人望卿以舊哲比嘗相予惟宇量能寬以服
人惟純誠故久而益信勲德兼著可以重朝廷忠信
不回可以臨大事夫謀於其始而旣審則果於必用
而不疑汝其欽哉朕命無易所讓宜不允仍斷來章

賜新除宰臣富弼讓恩命第二表不允仍斷
來章批答

卿有愛國愛君之心而忠以忘其已有經邦濟時之
學而用未究其能夫蓄久而積厚則施之不窮慮深
而計熟則謀無不獲茲朕所以虚心及席有望於卿
也矧卿正直不回庸邪素忌小人所異君子所同是
以在外十年而左右之譽不及履躬一德而搢紳之
望愈隆朕內決於心外詢于衆敢謂有得卿其可辭
所讓宜不允仍斷來章

撫問真定府高陽關河東等路臣寮口宣
卿等出分邊寄備罄材謀載加宣力之勞屬此爽秋
之候宜加撫慰俾示眷懷

撫問勿寧環慶涇原鎮戎軍德順軍路臣寮
口宣

卿等各韞材猷並膺寄任屬商秋之在候念障圍之
為勞宜有恩言用彰眷待

賜鎮海軍節度使檢校太尉同中書門下平
章事判亳州陳執中生日禮物口宣

卿榮擁節旄出臨藩翰屬茲誕日宜有寵頒當體眷
懷克膺茂數

賜右領軍衛將軍克冲獎諭勅書

朕覽先帝之遺文愴然增慕嘉汝志之顯學期乃有

成惟詹制之坦明合聖經之雅奧傳寫之善茲謂
能誦習不忘是為寶訓宜加褒勗以勉進脩

賜鎮海軍節度使檢校太尉同中書門下平
章事判亳州陳執中詔

卿近辭宰柄出守蕃宣方受署以云初効右宰而來
獻式彰誠蓋深用歎嘉

賜知建昌軍張貴和勅書

敦本勸農惟汝之職因時任土脩貢有儀載省勤誠
用增獎歎

賜吏部尚書同中書門下平章事文彥博生

日禮物口宣

卿以名世之材當秉鈞之任乃顧具瞻之重適臨載誕之辰爰示頒宣用彰眷遇

撫問麟府代州路臣寮口宣

卿等各蘊材猷出膺寄任綽著綬寧之績克彰勤盡之勞宜示撫存用推眷遇

賜侍衛親軍步軍副都指揮使涇州觀察使王凱赴闕茶藥口宣

卿遠戒戎車夙祇召節式及炎薰之候載惟道路之勤宜頒飲劑之良用示眷懷之厚

賜龍圖閣直學士給事中施昌言已下為修河了畢御筵口宣

卿等分庀工徒繕修隄捷遽茲訖事嘉乃有成宜推宴犒之恩用獎勞能之効

賜鎮東軍節度觀察留後知潁州李端愿赴闕茶藥詔

卿出布詔條入祗召節屬此炎歊之候深惟道路之勤宜頒藥劑之良用示眷懷之厚

賜天章閣待制知揚州許元詔

汝以材敏班余詔條眷乃淮海之濱產茲草木之美

以時采掇來效貢輸嘉爾勤誠良深歎獎

撫問廣南西路臣寮口宣

卿等並以幹能出分寄任顧此蘊隆之候載嘉宣布之勤宜示慰存用彰眷遇

除授陳執中行尚書左僕射充觀文殿大學士依舊判亳州加食邑食實封餘如故仍放

朝謝制

門下爵祿之寵所以優老而崇賢退讓之風所以勵俗而敦化眷我元輔殿于近邦屢辭將相之榮備述君臣之遇雖重違懇悃之請而豈無恩意之隆爰告

外庭以旌嘉尚具官陳執中質性剛直姿識敏明出於名臣之家早有時材之用自更中外之任實勤夙夜之勞出撫師徒宣威種落之外入參機要竭忠推懼之間至於兩踐台司首當國論杜門絕請善避權勢以遠嫌處事執心不為毀譽而更守顧方深於倚信乃祈解於鈞衡兼秉旄調鼎之榮資鎮俗偃蕃之重所以優逸者哲養願精神而數形奏封每以疾告察其誠至良為惻然若夫中臺之崇端揆是為於師長秘殿之職詢訪實思於老成推此茂恩俾如爾志仍廣邑封之數即安屏翰之居於戲壹思慮以專心

勤藥石以自輔人實求舊予惟不忘勉期壽康往服
休命可特授行尚書左僕射克觀文殿大學士依舊
判亳州加食邑七百戶食實封三百戶功臣散官勲
封如故仍放朝謝主者施行

宣召曾公亮口宣

卿自辭職禁林班條近輔休有政績播于民聲旣深
東於予衷俾召還其舊物矧爾材望著于搢紳豈惟
潤色之文方佇論思之益

撫問河北路臣寮諸軍將校口宣

卿等任膺委寄職在綏寧當茲災沴之餘備著勞能

之效俾伸撫慰宜體眷懷

撫問樞密直學士施昌言爲患口宣

卿方委政條遽聞疾告致爽調和之理豈非夙夜之
勞勉輔大真冀遵藥喜俾伸撫慰式示眷懷

撫問澶州滑州衛州通利軍梅摯等及存恤

逐州軍爲水災及防護堤岸口宣

卿等列蕃宣之重寄罹澍潦之時災顧乃兵民載深
隱惻尚賴班條之善克伸捍患之勞往道予懷俾伸
慰撫

賜昭德軍節度使龐籍并武康軍節度使韓

琦龍神衛四廂都指揮使英州團縛使郝質
各進奉端午馬詔勅

卿外分寄任方切眷懷屬令節之紀時効駿足而來
貢備彰勤蓋深所歎嘉

賜溪洞進奉乾元節并端午勅書

汝夙被朝恩克綏種落屬茲佳節來効貢儀省乃勤
誠良深歎獎

賜外任臣寮進奉乾元節功德疏詔勅

卿夙韞材猷出分委寄屬茲誕節來効勤誠載詳善
禱之言彌見愛君之義良深歎尚宜體眷懷

賜外任臣寮進奉助恭謝禮畢銀絹等詔勅

國有大事嚴祀以薦馨臣能盡忠因物而脩禮分職
在外乃心于朝載陳來助之儀深歎勤誠之至

賜武康軍節度使韓琦到闕坐對口宣

卿德著者明時膺材任祇趨召節方及國門宜示頒
宣式彰眷遇

賜新授四方館使依舊英州刺史馬懷德進
奉謝恩馬勅書

汝近以疇勞擢陞要職乃求良駿來備貢輸深推報
國之誠更俟奮身之効良深嘉獎當悉眷懷

賜知池州包拯進奉石菖蒲一銀合勅書

汝識遠言忠身外心內乃因時物來効貢儀深體誠
勤益增歎尚

賜新授觀文殿大學士行尚書左僕射陳執

中詔

卿出藩垣自陳疾恙秘殿之職揆路之崇所以褒
優輔臣增重朝體而乃發於誠慤來効貢輸載省恪
勤但深嘉尚

賜新除資政殿大學士知青州孫沔告勅并

對衣鞍轡馬口宣

為名臣又撫方面俾加美職徒領要藩仍推
之優式示眷懷之厚

賜護國軍三軍將吏僧道百姓等為護國軍

節度使樞密使狄青罷政加平章事判陳州

示諭勅書

勅護國軍某人等朕以狄青夙兼忠勇之姿嘗著勤
庸之効自參機務頗歷歲時載深乃眷之懷優以均
勞之寵惟命崇於名器蓋體繫於朝廷是加鼎軸之
司委以藩垣之任乃人臣之榮遇想輿論之僉諧

賜翰林學士尚書左司郎中知制誥權知審

刑院曾公亮詔

國家致治之難惟刑是恤使民無犯嗟訓導之未純
執法必平顧重輕而宜允卿以精識傳之經術不特
明而克審既能敏而加勤期於無刑予敢不勉靡有
留事爾實爲材副乃憂勞良深歎獎

賜尚書刑部員外郎兼侍御史知雜事權判
大理寺郭申錫等勅書

獄重事也余所慎焉五刑之難請比之文毛舉四海
之廣報決之書日繁汝以通敏之姿濟之夙夜之力
庸刑不用余實慕於前猷俾獄無留汝則能於厥

制我欽恤良增歎嘉

除劉沆特授行工部尚書充觀文殿大學士
知應天府加食邑實封仍改賜功臣餘如故
制

門下罄一節以事君中外之任無間處大臣而有體
進退之禮必優矧余輔弼之良方賴股肱之寄屢形
懇避嘉敦慤之弗移宜峻寵章示眷懷之特異具官
劉沆質性剛鯁姿材敏明早以藝文策雋科於異等
遂追髦彥騰夷路以飛華人必侍於清閑出屢更於
事任翼翼是則有聲京邑之雄巖巖具瞻遂參廊廟

之用乃疇嘉績爰正台司執毀譽不回之心篤於自信勤夙夜匪懈之志久而益勞顧方厚於倚毗乃遠思於退讓宴見之際有言而必誠封章之來雖却而復至察其所守實亦重違惟茲祕殿之嚴眷乃留都之重既增美秩仍益真封寵我邇臣斯為異數雖如汝志尚東予衷於戲秉國之鈞居則坐而論道為時舊老往則殿于大邦是惟出處之榮勉服便蕃之命可特授行工部尚書充觀文殿大學士知應天府加食邑一千戶食實封四百戶仍改賜推誠保德崇仁忠亮勳臣散官勳封如故王者施行

賜新除同中書門下平章事判大名府傅
彰信軍節度使李昭亮讓恩命不允詔

勳閥之門世承舊德忠勤之節効著厥官惟別都
實鑰之嚴兼方面鎮臨之重俾提相印增寵將旄嘉
辭讓之有儀在眷懷而豈易爾毋固執往服新恩
賜溪洞進奉助恭謝賀冬賀正水銀綿紬等

勅書

汝世膺朝寵能撫其人時効乃誠善修其首載惟忠
恪深用歎嘉

賜樞密副使程戡生日詔

卿久罄謀猷叶宣機政眷惟誕日屬此令時宜推寵
賚之優式示顧懷之厚

賜諸道州府軍監及四京恤刑詔勅

朕欲使民知禮義以遠罪而惠乎勸戒之未明蠢茲
羣愚猶冒常憲顧此溽暑閔然拘繫卿夙以敏材外
分憂寄惟刑之恤當體於朕心舉政以時勉思於汝
職務從欽慎庸副哀矜

賜河北東西路邊臣夏藥及傳宣撫問口宣
卿等各以敏材任茲邊寄屬此炎歊之候深惟勤悴
之勞俾頒藥劑之良式示眷懷之厚

賜昭德軍節度使檢校太傅知并州龐籍

諭戒勅

龐籍省所上表麟州中管勾麟府州軍馬司郭恩
領兵過屈野河陷沒待罪事具悉卿以文武之才更
將相之任入籌帷幄早資決勝之謀出撫邊隅方重
臨戎之寄載惟同德可諒宣勤而裨校貪功曾罔虞
於萬毒敗沒銜辱致輕損於國威嘉封奏之上陳能
列言而引咎雖勇夫債於輕敵彼實自貽而智者慮
於未形宜無不備已失難追於既往後圖猶倚於老
成勉思節制之方用副眷懷之厚故茲詔示想宜知

悉夏熱卿比平安好遣書指不多及

賜宰臣富弼上第三表乞退不允斷來章批
答

朕眷惟宰輔之司實繫朝廷之重職或非稱勢因是
擢比以連年馱於屢易戒用人之不審致厥位之靡
安故於圖任之初尤極精求之意而議者謂卿有天
下之譽慶朕得非常之才豈惟斷不惑於予心固以
慰文鬱之人望則朕之用卿者至矣卿之自待者如
何而方沃嘉猷遽形退讓駭無因而及此曾莫諭於
乃豈堂廊廟之崇責重者其憂難任而富貴之

則其慮易危邪朕嘗歷考往昔之人其於進退之
適計而圖全者未必無患忘身而徇國者固多令
各惟爾之明必知所擇宜少安於職業用深體於倚
毗所乞宜不允仍斷來章

賜充國公主陳讓恩命第三表不允斷來章
手詔

省所三上表陳讓充國公主事具悉古者周姬下嫁
車服不繫於其夫漢女有封湯沐並開於新邑所以
重國家之體隆親愛之恩稽累聖之舊章皆按圖而
啓國汝以天姿之甚淑習姆教而已閑方及有行乃

導先制俾褒賢懿用錫土田而乃志在撝謙願還渥澤固辭以禮既深體於懇誠承命必恭宜勉祇於寵數所讓宜不允仍斷來章付充國公主

賜知乾寧軍高遵約獎諭勅書

勅高遵約省河北安撫提刑司奏勘會乾寧軍去歲值大雨河水泛漲衝破護城堤滄浸城壁其河岸大段墊壞軍城危急汝乘此水災徑赴本任交割勾當尋計度功料多方用心躬親部役修築河堤及護城堤至今年三月內了當甚得堅固本軍又遠委不消遷廢伏乞特加旌賞事嚮以暑雨失節悍湍迅流水

防廢官衝溢為患汝能奔走就職勤勞匪躬民氓無望滿之虞壁壘得繕完之固厥效明著攸司以聞載覽憂顧之懷宜示褒嘉之意故茲獎諭想宜知悉秋熟汝比好否遣書指不多及

賜樞密副使田况生日禮物詔

卿夙韞才猷贊吾機務屬涼秋之肅物嘉誕日之屆期宜有寵頒以彰恩眷


贈保順軍節度使張惟吉祭文

維至和二年歲次乙未三月己未朔皇帝遣入內內侍省內西頭供奉官勾當延福宮康為政致祭于贈

保順軍節度使張惟吉之靈惟靈忠勤之節克保於
有終存歿之恩備隆於異數仍加祖奠式表哀榮尚
享

贈保順軍節度使張惟吉祭文

維靈佐佑宣力始終不渝載嘉遺忠實用追惻奠爾
臨壙魂其有知



張文忠公全集卷一百三十

